

Saterdag **30 Maart**

**Skrifgedeelte: Openbaring 6:9-11**

**Fokusgedeelte: Openbaring 6:10**

**God is regverdig**

As God ons in 'n wêreld bemoedig waar dit al hoe moeiliker word om 'n Christen te wees, neem Hy ons deur sy Woord na 'n tempeltoneel waar die offeraltaar 'n baie belangrike plek ingeneem het. 'n Altaar was 'n plek waar 'n dier geslag was, en nadat die dier op die altaar geplaas was, het sy bloed na die onderkant van die altaar gedrup. Die bloed was beskou as die lewe van die dier (Lev.17:14).

Die siele van diegene aan die voet van die altaar wat aan die woord van God gehoorsaam gebly het en sonder ophou van Christus getuig het, is dus diegene wat deur die eeue hulle lewens ter wille van Christus verloor het. Dis hulle wat teen die stroom in aangehou het om te hou by dit wat God in sy Woord leer en net die dood kon hulle getuies rakende Christus stilmaak. Hulle uitroep dat God sy oordeel tot uitvoer moet bring, is 'n belydenis en 'n vertrouwe in God se regverdigheid. Hulle weet God is regverdig, en biddend wag hulle die tyd en oomblik in waar alle onreg deur God vernietig gaan word.

As ons kyk wat in ons eie land en in die wêreld aan die gebeur is, wonder ons nes Jeremia ook soms of daar nog iemand is wat reg doen (vgl. Jer. 5:1-2). Verder raak dit al hoe moeiliker om daagliks 'n getroue getuie en navolger van Jesus te wees. Ons hoop lê in die vaste sekerheid dat God regverdig is en dat Hy 'n einde aan alle onreg gaan maak. Dalk nie vandag of môre nie, maar dit kom beslis.

*Sing: Psalm 34-1:6, 7*

*Ds. HJ (Hendrik) Stoltz (Ontdekkers)*